



PREZIDÊNCIA KONSELLU MINISTRUS

VI GOVERNUN KONSTITUSIONÁL

DILI, LORON 29 FULAN-DEZEMBRU TINAN 2015

KOMUNIKADU IMPRENSA

Sorumutuk Konsellu Ministrus nian iha loron 29 fulan-dezemburu tinan 2015

Konsellu Ministrus hala'o sorumutuk iha tersa ne'e, loron 29 fulan-dezemburu tinan 2015, iha sala sorumutuk Konsellu Ministrus nian, iha Palásiu Governu, iha Dili, no aprova ona **Rezolusaun Governu nian ne'ebé kria Jardín Botániku Francisco Xavier do Amaral**.

Haree ba objetivu no estratéjia hirak ne'ebé mak estabesele tiha ona iha Planu Estratéjiku Dezenvolvimentu tinan 2011-2030 nian, iha Programa Governu Konstitusionál VI no iha Estratéjia Nasionál Biodiversidade nian ne'ebé ko'alia kona-ba protesaun ambiente no konsersaun biodiversidade nian, Konsellu Ministrus aprova ona kriaun Jardín Botániku Francisco Xavier do Amaral, iha aldeia Ai Merahun, Suku Asumau, Postu Administrativu Remexiu, iha Minisípiu Aileu.

Jardín Botániku ne'e sei instala no akompañia husi komisaun instaladora akompañamentu nian ida ne'ebé maka sei, iha instánsia dahuluk, define planu asaun nian, mekanizmu jestaun nian sira no regulamentu internu. Fatin ne'e, ho luan hamutuk ektar 28, no ninia objetivu prinsipál sira mak: estudu no investigasaun sientífika kona-ba rekursu fauna nian hirak ne'ebé existe iha ne'ebá, kriaun banku semente no jermoplazma, konsersaun biodiversidade vejetál husi espésie nativa no exótika sira, liuliu hirak ne'ebé iha hela ameasa nia laran ka besik ona atu lakon, kombate hasoru estinsaun espésie vejetál sira, konxiensializasaun ba públiku ba valór husi diversidade biolójika nian no amesa hirak diversidade ne'e sujeita ba, no dezenvolvimentu asaun konkreta sira ba benefísiu husi ambiente, entre sira seluk.



Palácio do Governo,
Avenida Presidente Nicolau Lobato,
Dili, Timor-Leste

pcm.gov.tl@gmail.com
(+670) 33 310 608